

Կ Ա Ր Գ

ԱԽՏԱԲԱՆԱՆԱՏՈՄԻԱԿԱՆ ՓՈՐՁԱՔՆՆՈՒԹՅՈՒՆՆԵՐԻ ԱՆՑԿԱՑՄԱՆ

I. ԸՆԴՀԱՆՈՒՐ ԴՐՈՒՅԹՆԵՐ

1. Սույն կարգով կարգավորվում են Հայաստանի Հանրապետությունում ախտաբանաանատոմիական փորձաքննությունների իրականացման և դրա արդյունքներն այլ անձանց տրամադրելու հետ կապված հարաբերությունները:

2. Սույն կարգը չի տարածվում Հայաստանի Հանրապետության քրեական դատավարության, Հայաստանի Հանրապետության քաղաքացիական դատավարության և Հայաստանի Հանրապետության վարչական դատավարության օրենսգրքերով նախատեսվող փորձաքննությունների վրա:

3. Ախտաբանաանատոմիական փորձաքննությունը կատարվում է բժշկական օգնության և սպասարկման համապատասխան տեսակի համար լիցենզավորված հաստատությունում (այսուհետ՝ հաստատություն)՝ Հայաստանի Հանրապետության օրենսդրությանը և սույն կարգին համապատասխան:

4. Ախտաբանաանատոմիական փորձաքննության հիմնական նպատակն ախտաբանական հետազոտությունների արդյունքների և կլինիկական տվյալների համադրումը և վերջնական ախտորոշման հաստատումն է:

II. ԱԽՏԱԲԱՆԱՆԱՏՈՄԻԱԿԱՆ ՓՈՐՁԱՔՆՆՈՒԹՅԱՆ ԱՆԿԱՑՄԱՆ ԿԱՐԳԸ

5. Ախտաբանաանատոմիական փորձաքննությունը, որպես բժշկական փորձաքննու-

թյան ձև, ներառում է՝

- 1) բիոպսիոն հետազոտությունը, կատարման ժամկետը՝ 3 օր.
- 2) ցիտոլոգիական հետազոտությունը, կատարման ժամկետը՝ մեկ օր.
- 3) ախտաբանաանատոմիական հերձույնը, կատարման ժամկետը՝ 24 ժամ.
- 4) ախտաբանաանատոմիական հերձման (աուտոպսիա) նյութի հետազոտությունը,

կատարման ժամկետը՝ առնվազն՝ 15 օր.

- 5) ընկերքի հետազոտությունը, կատարման ժամկետը՝ մինչև 15 օր.
- 6) փորձագիտական խորհրդատվությունը, կատարման ժամկետը՝ մեկ օր.
- 7) բժշկական միջամտության հետևանքների փորձագիտական գնահատումը, կատար-

ման ժամկետը՝ մեկ ամիս.

- 8) բժշկական փաստաթղթերի փորձաքննությունը, կատարման ժամկետը՝ մեկ ամիս:

6. Ախտաբանաանատոմիական փորձաքննությունն իրականացվում է համապատասխան որակավորում ունեցող մասնագետի և այլ բժշկական մասնագետների մասնակցությամբ՝ պացիենտի կամ նրա օրինական ներկայացուցչի կամ ընտանիքի անդամների դիմումի հիման վրա:

7. Ախտաբանաանատոմիական փորձաքննության օբյեկտ են համարվում մահացածի մարմինը, կենդանի մարդու և մահացածի օրգանները, հյուսվածքները, խոռոչավոր օրգանների պարունակությունը, գեղձերի արտազատուկը և բժշկական փաստաթղթերը:

### III. ԱԽՏԱԲԱՆԱՆԱՏՈՄԻԱԿԱՆ ՓՈՐՁԱՔՆՆՈՒԹՅԱՆ ՎԵՐԱԲԵՐՅԱԼ ԵԶՐԱԿԱՑՈՒԹՅՈՒՆԸ

8. Ախտաբանաանատոմիական փորձաքննության արդյունքում կազմվում է գրավոր եզրակացություն, որում նշվում են եզրակացության կազմման օրը, ամիսը, տարեթիվը,

պացիենտի ազգանունը, անունը, հայրանունը, սեռը, տարիքը, սույն կարգի 5-րդ կետով նախատեսված գործողությունների իրականացման ընթացքը և դրանց արդյունքները:

9. Ախտաբանաանատոմիական փորձաքննության վերաբերյալ եզրակացությունն ստորագրվում է փորձաքննությանը մասնակցած բոլոր մասնագետների կողմից: Եթե մասնագետներից որևէ մեկը փորձաքննության արդյունքում միասնական կարծիքի չի հանգում, ապա յուրաքանչյուր մասնագետ կազմում է առանձին եզրակացություն:

10. Ախտաբանաանատոմիական փորձաքննության արդյունքում վերջնական հաստատված ախտորոշումը գրանցվում է հիվանդության (ծննդաբերության) պատմության մեջ, իսկ եզրակացությունը կցվում է հիվանդության (ծննդաբերության) պատմությանը:

11. Ախտաբանաանատոմիական փորձաքննության արդյունքում ստացված տեղեկությունները, ինչպես նաև արդյունքում կազմված եզրակացությունը համարվում են բժշկական գաղտնիք և պահպանվում են Հայաստանի Հանրապետության օրենսդրությամբ սահմանված կարգով:

12. Ախտաբանաանատոմիական փորձաքննության վերաբերյալ եզրակացությունը հաստատության ղեկավարի կողմից տրամադրվում է միայն՝

1) պացիենտին կամ օրինական ներկայացուցչին՝ կենդանի մարդու նկատմամբ իրականացվող ախտաբանաանատոմիական փորձաքննության դեպքում.

2) ընտանիքի անդամներին՝ մահացածի նկատմամբ իրականացվող ախտաբանաանատոմիական փորձաքննության դեպքում.

3) օրենքով նախատեսված դեպքերում և կարգով ոստիկանությանը, դատախազությանը, ազգային անվտանգության ծառայությանը, հատուկ քննչական ծառայությանը կամ դատարանին:

13. Ախտաբանաանատոմիական փորձաքննության վերաբերյալ եզրակացությունը սույն կարգի 12-րդ կետի 1-ին և 2-րդ ենթակետերով նախատեսված անձանց տրամադրվում է

ախտաբանաանատոմիական փորձաքննության ավարտից հետո 5-օրյա ժամկետում, իսկ սույն կարգի 12-րդ կետի 3-րդ ենթակետով նախատեսված մարմիններին՝ հարցումն ստանալուց հետո 2-օրյա ժամկետում:

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ԿԱՌԱՎԱՐՈՒԹՅԱՆ ԱՇԽԱՏԱԿԱԶՄԻ  
ՂԵԿԱՎԱՐ

Դ. ՍԱՐԳՍՅԱՆ